

## CONVENIO MARCO DE COLABORACIÓN ENTRE O SERVIZO GALEGO DE SAÚDE E ALMIRALL, S.A PARA A PROMOCIÓN DA INVESTIGACIÓN E A FORMACIÓN CIENTÍFICA ORIENTADAS Á MELLORA DA ATENCIÓN AO PACIENTE

### MEMORIA XUSTIFICATIVA

O xerente do Servizo Galego de Saúde, **DECLARA QUE:**

O Servizo Galego de Saúde e Almirall, S.A. formalizaron o 15.10.2021 o convenio arriba referido, por un período de vixencia de catro anos, desde o día seguinte ao da súa sinatura, podendo ser prorrogado por anos naturais por acordo expreso das partes manifestado con anterioridade á data da súa finalización, de conformidade co disposto na letra h) do artigo 49 da Lei 40/2015, do 1 de outubro, de réxime xurídico do sector público.

O instrumento convencional ten por obxecto definir o ámbito das relacións de colaboración entre as partes asinantes, para a promoción da investigación e a formación orientadas á mellora da atención sanitaria, a través da promoción da investigación, a formación, a innovación ou a realización de estudos e intercambio de coñecemento científico e técnico.

Existe converxencia de intereses entre as entidades asinantes en orden á consecución do obxecto referido.

O instrumento convencional asinado fundaméntase, entre outros, en que:

O artigo 94 da Lei 8/2008, do 10 de xullo, de saúde de Galicia contempla entre as funcións do Servizo Galego de Saúde, a da promoción da docencia e a investigación en ciencias da saúde, no ámbito dos centros, servizos e establecementos sanitarios asistenciais, así como o desenvolvemento de programas de calidade e mellora da práctica clínica e de mellora de xestión.

O artigo 136 da dita Lei prevé, no ámbito da coordinación interdepartamental da atención sociosanitaria, que a Consellería de Sanidade fomentará actuacións integrais sociais e sanitarias ante aquelas circunstancias de dependencia, discapacidade ou outras en que a cooperación conleve vantaxes sociais e asistenciais.

A Consellería de Sanidade, a través do Servizo Galego de Saúde, ten como un dos seus obxectivos a prevención e a atención sanitaria. A súa finalidade é impulsar, planificar, coordinar e avaliar as actuacións levadas a termo para mellorar o proceso de atención e, isto, coa implicación de todos os axentes do sistema de saúde e do sistema social, co fin de establecer un marco de actuación integral.

Outro dos obxectivos relacionados é a mellora da utilización dos medicamentos, tanto na atención primaria de saúde como na atención hospitalaria e sociosanitaria. Neste sentido, unha das liñas de actuación consiste no impulso de actividades dirixidas á mellora de aspectos como a educación sanitaria dos pacientes e cidadáns e o bo uso dos medicamentos, a súa adherencia aos tratamentos prescritos, a formación científica dos profesionais sanitarios ou a investigación nestas materias, coa finalidade de mellorar a atención e o servizo de saúde aos pacientes.

A Consellería de Sanidade ten entidades públicas adscritas e funcionalmente dependentes do Servizo Galego de Saúde ás que encomendar servizos e tarefas dentro do seu ámbito de actuación, como é o caso da Axencia galega para a xestión do coñecemento en saúde (ACIS), cuxo obxecto principal da súa actividade é a docencia, a formación e investigación en administración e xestión sanitaria, sociosanitaria, saúde pública e asistencia sanitaria, de conformidade coas directrices emanadas da Consellería de Sanidade e do Servizo Galego de Saúde.

Almirall, S.A. ten por obxecto social e finalidades a investigación, o desenvolvemento, a fabricación e comercialización de medicamentos.

Un dos seus obxectivos de innovación e investigación é traballar para a calidade de vida dos pacientes que sofren enfermidades. Neste sentido a súa vontade é ofrecer produtos e servizos que axuden a mellorar a súa calidade de vida, á sociedade en xeral e contribuír a xerar coñecemento e colaborar na mellora da calidade asistencial. En consecuencia, pode adoptar e desenvolver actividades de investigación, formativas e de atención ao paciente crónico, contando coa colaboración e apoio científico, técnico e institucional dos xestores de servizos sanitarios.

A dita entidade quere aliñarse cos obxectivos do Servizo Galego de Saúde, e implicarse como axente colaborador mediante a expresión das pautas e liñas xerais contidas no convenio marco formalizado entre as partes, en relación á mellora da atención sanitaria.

Os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela.

